

حزن بالألوان

الحزن مش بالاسود الحزن بكل الالوان

كان يا ما كان واحد حزن لبس اسود

ولسه حزين مع انه لبس الوان

لبس احمر صرخ الاحمر من على الفستان

لبس ابيض غسل الدمع قلبه من الاحزان

لبس ازرق تاه مع الاسود ماخله بيان

الابيض بلون الكفن والاحمر نرف الوان

والعين اتكحلت اسود خلت ننى العين فرحان

الحزن مش صورة على الصدر

عمال يقلب فيها اللبس

الحزن صورة فى القلب

محفورة وما يطولها اللمس
الحزن ليل ما عرف شمس
ينكسر ببسمة ويرجع تانى يهمس همس
الحزن مش دمعة على الخد
يمسحها مندليك او اى حد
الحزن سيل من القدم لليد
يجرف فرحتك من جمعتك للاحد
يجرف ضحكك ولو ضحكت بجد
الحزن بير فيه ذكرى ووردة وود وصد
ارمى فيه مهما ترمى مرارته ع القلب تترد
ماهو حزن النفوس الوان
نفس ساكنها انات ناصبة فيها مخيمات
ونفس بتتن بس واخده مسكنات
الظاهر فيها عادى اما من جوة حكايات

نفس ماشية تكسر ف الاشارات
ونفس ماشيه على حبل ولا البهلوانات
ونفس ماشية تلملم فى وشوش الناس حاجات
تجمع من وشوشهم ملامح لاحبه وعمر فات
نفس خارجه من جواها تتفسح
ونفس جواها اكبر واعظم مسرح
ونفس متعورة وللشفا بتسمح
ونفس متجيسه وجبسه ببيطح
بس النفس اللى طارت للسما انجح
كسرت سجنها وطايرة تتمرجح
يهف هواها على العايشين وينفح
والعايشين من هواهم متعلقين فى مدبح
شوق الاحبة سكاكين مرة تقطع ومرة بتدبح